

మావంగ్ సర్కీ



రెండవ పుస్తక్

Our Festivals (māvang saḍk)

Second Book (reṇḍava pustak)

A collection of stories for new readers of the Gondi language.

Authors:

Various

Edited by:

Pendur Durnath Rao

Mark Penny

Published by:

Integrated Tribal Development Agency (I.T.D.A.)

Utnoor, Adilabad District, Andhra Pradesh

In association with:

SIL International – Partners in Language Development

Illustrations by:

Christoph von Fürer-Haimendorf (1948)

U. Vishwanath

Joanna Penny

Copies printed:

October 2006, 300 copies

January 2008, 1000 copies

Copyright:

This compilation is copyright © 2008. Anyone is permitted to copy and distribute copies of this text or any portion of this text. It may be incorporated in a larger work, and/or quoted from, stored in a database retrieval system, photocopied, reprinted or otherwise duplicated by anyone without prior notification, permission, compensation to the holder, or any other restrictions. All rights to this text are released to everyone and no one can reduce these rights at any time.

మావంగ్ సడ్క

రెండవ పుస్తక్

విషయ సూచిక

1.	మావంగ్ సడ్క	3
2.	కర్నాట్	4
3.	దివాడిత డండారి.....	4
4.	హిరుక్ మర్ల.....	7
5.	నాగు డాక్టర్ తగ సాత్తోర్	9
6.	మర్మి మండ.....	11
7.	సాతొన కారున్.....	11
8.	బెయే బాబొ అని కాండి	12
9.	జింగు అక్కోన నార్ సూడ్లే సాత్తోర్.....	15
10.	దేవారి అని పిర్	17

1. మావంగ్ సడ్క

వేందూర్ దుర్బత్ రావ్ (భీముగూడ)

(1) నాగల్-పంచమి సన్

మొమొట్ నాగల్ పంచమి 'సన్ దూన్ నేటి సప్తి నాట్నంగ్ బాయిక్ రొహ్క-రచ్చంగ్ కీంతంగ్. యేర్ తుంగ్ని లెహంగ్ పిడు సీంతంగ్. మక్కెంగ్, సడాయింగ్, తూరింగ్, లెహజొన్న, ఇవు సప్తి తావతె ఆయి బుడ్డతె ఆయి పిడు సీంతంగ్. మల్ల మయనలిర్ లెహంగ్ పియ్యి నాటేన్ బహ్రా పుత్తిత్ గ దాంతేర్ సప్తిర్ మీరె మాసి లెహంగ్, పాల్ పియ్యి దాంతేర్ పాటంగ్ వారంతేర్. మర్ల సప్తిర్ లెహంగ్ మీరి కీసి జర-జర సప్తిర్ కున్ తూసంతేర్. అని తింతేర్. మల్ల తిన్నా కెయ్ దగ కాకన్ నూల్ దొహంతేర్. సప్తిర్ నాటే వాంతెర్. రోన్ పేన్క కీసి తింతేర్. పంచమిత్ నేటి బోరే గాబో తిన్నూర్ సప్తిర్ లెహంగ్ తింతేర్. డగూక్ కాండిర్ "పార్న" దొహంతేర్, సప్తిర్ చుడూర్-డగూర్ సప్తిర్ ఉంతేర్. మొమొట్ సియుంగ్ రోజ్క పార్న ఉజంతొం మల్ల పార్న రెహంతేర్. మొమొట్ పంచమి హిన్ కీంతోం.

(2) రాకిట్క దొహ్వల్ సన్

రాకిట్క దొహ్వల్ సన్, వాత ఇంజేర్ సేలక్, ఆయి బాయిక్ దుస్రా నాటే మత్తెకే తాదల్ తమ్మున రోన్ రాకిట్ దొహ్లా వాంతంగ్. ఊర్ దిక్కి చోరి యేతంతేర్. మల్ల బూడ్ ఉప్పు సీంతంగ్, బొట్ కెరుసీంత రాకిట్ దొహంత, సాకుర్ తిహంత. మల్ల తిన్నా సెట్టతే కప్పి వాటంతేర్. మల్ల పొండ్ని సప్తిర్క కలియంత. మల్ల తన్వ నాటే దాంత.


(3) జామడ-ఆవున్ సన్

మొమొట్ జామడ ఆవున్ సన్ దున్ నేటి సప్తి నాట్నంగ్ బాయిక్ రొహ్క-రచ్చంగ్ కీంతంగ్. కాండిర్ కేడతె దాంతేర్, కోడంగ్ తర్ల. కోడంగ్ నెట్ క్వి తరంతేర్. కోడన్ చీపంగ్ దొహంతేర్ నుల్వె , కోడనగ నివోద్

కింతేర్. మల్ల కాండిర్ తాకంతేర్. మొముట్ కోడంగ్ పోర మహిన వానల్ తాకంతొం మావంగ్ కోడంగ్ మల్ల బడ్గత సన్దున్ నేటి జాగెయ్ మాతరిన్ ఇంజేర్ సివతె వోంతేర్.

2. కర్నాట్

వేందూర్ దుర్నత్ రావ్ (భీముగూడ)



కర్నాట్ కోయ్తుర ఆందు. కర్నాట్ సమ్మిర్ నేకుస పరూర్ కరితోర్ వోరె నేకుసన. కర్నాటున్ పటాడి తోయ్టల్ నేకుసన్ సాటి హాక్ సెల్లె. కర్నాట్ నేకు సీసెర్ పాట వారంతేర్. బోరే రాజాన ఆయి పేన్ద తొల్లె జర్గిత అద్. కర్నాటున్ పేన్ పుర్కంగ్ రండ్ మందంతంగ్. కర్నాట్ కెట్టెత మందంత. కర్నాటున్ రండ్ తార్క్ మందంతంగ్. కర్నాట్నంగ్ తార్క్కున్ కూజతే నేకుసంతేర్. కూజత్ కోడతంగ్ కెల్క్ దొప్పి మందంతంగ్. కర్నాటున్ తార్క్కున్ బూడ్ కచ్చుల్క్-కచ్చుల్క్ మందంతంగ్. కర్నాట్ నేకు సీనెకే కచ్చుల్క్ నగ బొట్టనే పాట అరూ సీంతేర్.

3. దివాడిత డండాారి

వ్రామన్ డార్ఫ్ అని ఎన్. బి. జోగల్కార్ (1946)

నేండ్ ఆకాడి మహినత లెతేంజ్ (నెలేంజ్) తొహంత. తొహ్త పెజె సియుంగ్ దినంక్నే ఆకాడి తుంగన్తోం నర్క ఆకాడ తెండంతేర్. అంటితల్ యేంద్యవల్ సురు అంత. దినం-దినం నర్కక్ యేందంతేర్. ఆకాడి, పోర, అకురోప్క్, సోడియంతంగ్. దివాడిత లెతేంజ్ (నెలేంజ్) తొహంత. సమ్మిర్

చుడూర్-డగూర్ బమ్ కూసి ఆంతేర్. సియుంగ్ దినమ్మన ఆవున్ మందంత ఇంజేర్ బోగింగ్ తుంకట్ ఇంతేర్.

పాట్లాన రోన్ సమ్మిర్ నాట్నూర్ మీరె మాసి "బోగింగ్, బంటి తుంకట్ రా? సారంగ్ బవొక్ వడ్కకట్" రా? ఇంజేర్ రాయపాస్ కీంతేర్. నాట్నూంగ్ బాయిక్ సమ్మి రొహ్కారచ్చుంగ్ కీసి నివొద్దు అటంతంగ్. గమ్మి తార్సి కోడల్, గుసాడి టోపింగ్, రోకాలిక్, డమ్క, చవోచ్చయ్ కోలంగ్, కోడల్ పేమ్క బూడ్ ఉపు సీంతేర్. సక్రెన్ బోగి తుంగన్తేర్. బాయిక్ నివోద్కవోంతంగ్. వోత పెజ్జె నివోద్ దొసంతంగ్. గుసాడ్క, కోల వెహ్వాల్, పోరిక్, సమ్మిర్ మీరె మాసి నివొద్దు గాటో తింతేర్.



నాట్నూర్ బోస రోన్ వోర్ సొంజి గాటో తింతేర్. మర్ల మీరె మాసి రండ పరా పోరిక్, రండ గుమేలా పోరిక్, సచ్చి కీంతేర్. మల్ జాలినంగ్ టోపింగ్ కెర్సి, పరాత్ ఇవ్వీర్, గుమేలత్ ఇవ్వీర్ గుసాడ్క ఆంతేర్. హెరై తోల్ సెట్టతే, కెయ్దే రోకాల్, మేందొదె దవరల్ తోడి సోక్సి, తెయార్ ఆంతేర్. నాటే సమ్మిర్ మీరె మాసి డండారి సక్రే అని నర్కక్ యేందంతేర్.



మర్ల ఉంది దియ్య డండారి పియ్య దుస్రా నాటే యేంద్లె చుడూర్-డగూర్ సమ్మిర్, నర్కక్ దాంతేర్. అద్ నాటే సొంజి డండారి నేంగంతేర్. మర్ల నాట్నూర్ వెర్తలిరంగ్ కాల్క నొరంతేర్. గోనతగ ఉపు సీంతేర్. సమ్మిర్ సార-సారని నిపంతేర్. పేమ్కున్ డారి-బేల్లి వాటంతేర్ అని కాల్ కెరంతేర్. రామ్ రామ్ ఇంతేర్

నాట్యూర్క్ చుడూర్-డగూర్ చొకొబ్త్ మంతిటూ? ఇంజేర్ పూసి కీంతేర్. మంతోం ఇంతేర్. మిమెబ్త్ మంతిటూ? మంతోం ఇంతేర్. మర్ల చచ్చోయ్ యేందంతేర్ గాబో తింతేర్. అని నర్క నర్మంతేర్.


మల్ల సక్రే తేచి బొడ్డింగ్ నొరంతేర్. చెహ ఉంటేర్ అని యేందంతేర్, సొత్త నాబే కూసి గమ్మత్ కీంతేర్. అని బయ్ కేల్క తెండంతేర్. మల్ల పేన్కున్ పూజ కీసి దుపారి తింతేర్. మల్ల జరసి యేంచి బంద్ కీసి మాన్ కోల సీసి కలిసినాబే వాంతేర్. మున్నెత సాల్ ఇద్ నాట్నూర్ డండారి పియ్ని అద్ నాబే దాంతేర్. అని నేండ పోరైక్ దివాడి ఇంజేర్ గాబో, కుస్తి, గార్కంగ్, కీసి. పేన్ మూలతగ దివాడి సన్ ఇంజేర్ నివోద్ కీంతేర్. అని పబికంగ్ వొహంతేర్. అని తింతేర్, మీరె మాసి నర్క డండారి యేందంతేర్. మల్ల సక్రే లక్ష్మి పూజ పేన్కు కీంతేర్. మూరనగ టాపుక్, గుంగుక్, జీలంగ్, సప్తి దొహంతేర్. చుడూర్-డగూర్ పూనంగ్ కష్టింగ్ ఆంగ్గొంగ్-దోత్తొంగ్, కెరంతేర్. బాయిక్ కష్టింగ్ పోండంతంగ్. మల్ల పేన్కు కీంతేర్ మూరన్ మిట్టు సీంతేర్, గాన్ తిహంతేర్. ఉండే సప్తిర్ కూసితె మందంతేర్ అని గాబో తింతేర్.




మల్ల దుస్రా నేటి ఆర్తింగ్ మీరి కీసి హిరుక్ మర్రతగ సాంజి కోల రెహంతేర్, గుసాడ్క యేర్ తుంగ్ని పేన్కు రోన్ తచ్చి రొప్పొ ఇరంతేర్. అని సప్తిర్ నాట్నూర్ చుడూర్ డగూర్ మీరె మాసి ఉంది జేవున్ అట్టి తింతేర్. నేండ మావ డండారి సారె మాత.

4. హిరుక్ మర్

హైమన్ డార్ప్ అని ఎస్. బి. జోగల్కార్ (1946)




మావ నాటున్ కరూం కేడ మంత. ఇద్ కేడతల్ మాకున్ వెల్లె పాయ్ద మంత. ఇద్ కేడత్ రొప్పొ మావ యేర్కతంగ్ వెల్లె మరక్ మంతంగ్. తేక, వెద్దుక్, తుమ్మి మరక్, సెర్కా మరక్, కుర్సి, వెంగుక్, వెల్లె మరక్ మంతంగ్. ఇవెక్కుంగ్ రొహ్కా తెహంతేర్. సెర్కంగ్, తుమ్మింగ్, కొహ్కాంగ్ అవెక్కా పండింగ్ తిత్తేర్. వత్తంగ్ కెట్టెంగ్ యెదన్ సాటి తరంతేర్. పినిత్ రొప్పొ కెట్టెన తడ్డి ముచ్చుక్ ఆయి. హిరోడంగ్, కొహ్కాంగ్, తుమ్మింగ్, సెర్కంగ్ పండింగ్ వొమంతేర్. ఇహిన్-వెల్లె మరక్ మాకున్ మంతంగ్. బతి ఇవ్ మరకున్ రొప్పొ ఇత్తేకే హిరుక్ మర్ వెల్లె పాయ్దత మంత. మావంగ్ పేస్కున్ రొప్పొ ఇద్ మరతున్ వెల్లె పదవి మంత. వూస్ మహినత్ ఇద్ మర్తత్ పూజ కీసి హిరుక్ పెరంతేర్. మర్తత్ బూడ్ ఉచ్చి పాట వారంతేర్.



మావ పెర్నా పేన్ మర్ద్ మర్త తగ మందంత. అవ్వల్ లీమ్ మర్తత్ బూడ్ మందంత. మహదేవల్ ఆలి మర్త తగ మందంత. రాజల్ డోన్డేర మర్త తగ మందంత. చంచి భీమల్ (హిరుక్) మర్త తగ మందంత. చంచి భీమనంగ్ మర్మింగ్ చైత్ మహినత్ కీంతేర్. ఇద్ మర్తత కెయ్టతంగ్ లాడి లాడనంగ్ రండ్ బొమ్మంగ్ కీంతేర్. ఇవ్ బొమ్మనంగ్ భీమనంగ్ మర్మింగ్ ఇంజేర్ కీంతేర్.

భారత్ రాజుల్ పూసి కీతోర్: "మర్తత రొప్పో మర్త బద్ డగూర్?" ఇత్తైకే, "హిరుక్ మర్త మంత". హిరుక్ మర్త తల్ మాకున్ వెల్లె పాయ్ద మంత. హిరుక్ మహొ దురాడి మహినత్ అరంతంగ్. హిరుకున్ కోందంగ్, హెర్నేంగ్, అని హెర్మింగ్ తింతంగ్. హిరుక్ పెర్ని తచ్చి కోయ్తుర్ అట్టి బొడ్డి సారింగ్ కీసి తింతేర్.



హిరుక్న కల్ రెహంతేర్. అని ఆకిత చుట్టా కీసి ఉండేర్. హిరుక్ మర్తతంగ్ గారన పెడెక్కు నియ్ తెండంతేర్. అద్ నియ్ డివెత్ దొన్నెన్ అని హిరుక్నగ మిసిడి కీసి తిన్లెన్ కామ్ వాంత.

5. నాగు డాక్టర్ తగ సాత్తోర్

వేందూర్ దుర్నత్ రావ్ (భీముగూడ)

- నాగు: రామ్ రామ్! డాక్టర్!
- డాక్టర్: రామ్ రామ్! వా, ఉద్ద.
- నాగు: మహ్కా నిన్నే బయ్ డగూర్ పిర్ అర్త.
- డాక్టర్: హిక్కె గిర్ నిన్నే బయ్ డగూర్ పిర్ అర్త.
- నాగు: మహ్కా సమ్మిర్ కాపుస్కె ఉర్సంతేర్.
- డాక్టర్: నీ వావై బద్ బద్ కాపుస్ ఉర్స్తీ?
- నాగు: నా వావై రండ మూండ్ తిర్కనంగ్ కాపుస్ ఉర్స్తోన్.
- డాక్టర్: ఉర్స్వలిక్ యెద్వలిక్ మంతంగ్ కీ ఆతంగ్?
- నాగు: ఉర్స్వలిర్ ఉర్సంతేర్, యెద్వలిర్ యెదంతేర్, మన్వలిరంగ్ మంతంగ్, బోసంగె పేర్సెంగ్ ఆతంగ్ గిర్ డాక్టర్.
- డాక్టర్: నీక్ బతల్ ఆత?
- నాగు: నాక్ నిన్నేతల్ యెడ్కి వాంత.
- డాక్టర్: ఇంకే నీక్ బహన్ ఆంత?
- నాగు: నావ జీవ బయ్ గమ్మత్ ఆంత.
- డాక్టర్: నాట్నీర్ సమ్మిర్ బహన్ మంతేర్?
- నాగు: నాట్నీర్ సమ్మిర్ ఇంకెతే చొకొట్ మంతేర్, బతి నాక్ చొకొట్ లాగో. డాక్టర్ నాక్ ఉంది సుయ్ సీమ్.
- డాక్టర్: బారి?
- నాగు: అస్కె యెడ్కి వాత తే సుయ్ సీతెకే సాడిత.
- డాక్టర్: హూ మొదోల్ డిగ్రీ వాట్నీ, సుయ్ సీంతోన్.

- (సుయ్ సీంతోర్) -



డాక్టర్: ఉండే గోలింగ్ లెహి కియ లాగర్.

నాగు: హా లెహి కీమ్. నన్ గోలింగ్ తరంతోన్.

- (గోలింగ్ కాగుత్ నగ లెహి కీసి సీంతోర్) -

డాక్టర్: గోలిన దుకాన్తగ సాంజి గోలింగ్ యేచి తర్.

- (మాయ్నల్ సాంజి యేచి తత్తోర్) -

నాగు: గోలింగ్ సూడ.

డాక్టర్: హా, ఇవ్వె. గోలిన్ హిన్ మింగ. సక్రే ఇవ్ రగలిక్, దుపారి ఇవ్ బోడలిక్, సంచా ఇవ్ రండ్ దవ్లిక్ మింగ. గోలింగ్ వెప్తా తీర్ మింగ మార్నల్ వేరి. బతి యెడ్కి జాద ఆతెకే మర్ల వా.

నాగు: హా, వాక.

డాక్టర్: నాటే ఉండే బోనే యెడ్కి వాతెకే నాక్ కేయట్.

నాగు: హా కేయంతోం. ఇంకే తే బోనే యెడ్కి వాసేర్ సెల్లె డాక్టర్.

6. మర్మి మండ

వేందూర్ దుర్నత్ రావ్ (భీముగూడ)

మర్మి మండ తెహాన్ సాటి మర్మి రోన్, రోత్ మున్నె మొదోల్ నోడతే గహి పియంతేర్. నాలుంగ్ మూలంగ్ నాల్వర్ జన్క మూలంగ్ చొకొట్ వాతం కీ సెల్లె ఇంజేర్ నోడతే గహి సూడంతేర్. మర్ల నడ్డుం ముండత్ సాటి ఉంది దర్ కాచంతేర్, డేరినంగ్ గిర్ దర్క బర్లన్ కాచంతేర్ సబలిక్కే. కాసుక్కే కేడతల్ వాసంగ్, వెద్దుక్ వోడంగ్ తర్ల దాంతేర్ తచ్చి బద్దే డెంగల్ టుగ్రి ఆతెకే అవెకున్ రాచంతేర్. సమ్మిర్ చుడూర్-డగూర్ మీరె మాసికున్ ఇద్ మండ తగ డేరింగ్ వాటంతేర్ డేరిన్ పొర్తా వోడంగ్ వాటంతేర్. అవేన్ పొర్తా వాసంగ్ మర్ల వెద్దుక్ నంగ్ బేరెనె పక్కి బద్దంగ్ దొహంతేర్ అని మర్మి మండ నిప్పి కీంతేర్. నేండ్ నొప్పి వాంత ఇంజేర్ సుల్పెక్ తోయ పోదేలంగ్ మండత్ పొర్తా వాటంతేర్. మర్ల మర్మి మండత్ సప్పి కీంతేర్. కాగుత్క డేరిన్ గ మాచంతేర్. బాయిక్ ముండ తగ బొవ్ల వాటంతంగ్. ఇహిన్ సప్పి కీంతేర్ ఇత్తైకే సమ్మిర్ మర్మిన్ గ వాతుర్ ఊర్ కూసి ఆయన ఊర్ ఆత్మసాంతి ఆయన ఇంజేర్ ఇద్ ఉంది మావ (కాయిద) ఇంజేర్ కీంతేర్. నాడి మర్మింగ్ ఇంజేర్ బయ్ కూసితె మందంతేర్. సమ్మిర్ చుడూర్-డగూర్ బాయిక్-దాదలిర్, మర్మిన్ గ వాతుర్ ఊర్ సమ్మిర్ గిర్ బయ్ కూసితె మందంతేర్.

7. సాతొన కారున్

వేందూర్ దుర్నత్ రావ్ (భీముగూడ)

కోయ్ తుర నాటే బద్దే రోతోర్ ఆయి, సాతెకే వెయిలోఆయి మాయ్ నల్, కాండి, పేడి, పాపాల్, బోర్ సాతెకే సమ్మిర్ నాట్నూర్ చుడూర్-డగూర్ సాతొన రోన్ మీరె మాంతేర్. మల్ల సూడ్వలిర్, రొప్పొ సాంజి సాతోర్ వోన్ సూడంతేర్. మల్ల రచ్చతే తడ్డి మాసంతేర్. పాట్లాల్, దేవారి, మహాజన్, ఘటియాల్, హవల్-దారాల్ నాట్నూర్ సమ్మిర్ రచ్చతే ఉదంతేర్ బగ బగ చుట్టాల్ మందంతేర్. అగ్గ మాయ్ నలిర్ తర్నొ ఖబూర్ సారి కీంతేర్.


ఊరకున్ బద్ అయితె నాటే రొహంతేర్ అద్ నాటే సాంజి ఖబూర్ వెహంతేర్. మల్ల వాంతోర్. చుట్టల్క గిర్ వాతేర్. మల్ల వెడిల్క, డగూక్, వీర్ సబ్బాల్, కోర, టొక్లి, టాట, ఇవు సమ్మి పియ్యి రొప్పోడల్ కాంచి పెసియంతేర్. లయితే తాక్సేర్ దాంతేర్. వావై ఆయి వీచ్చగ జాగ తగ సాంజి డొడ్డొ కాచ్చి వాంతేర్. మల్ల సమ్మిర్ నార్ నాప్పైర్ చుట్టల్క వాత పెజ్జె సాతోర్ వోన బహ్రా తెండంతేర్. యేర్ దొసంతేర్. పూన పాంగుడ్ పోండు సీంతేర్. మల్ల ఉర్పటింగ్ కటూల్ వాటంతేర్, మీడు సీంతేర్. మల్ల తల్ల దల్ అక్సీదాంగ్ వాప్పైర్ కాల్ వేరి వోంతేర్. కొత్త వాటంతేర్. చుడూర్-డగూర్ బాయిక్-మాయ్నల్ సమ్మిర్ ఇహిను మిటు సీంతేర్. అని కూర్దున్ నాల్వీర్ జన్క కటుడున్ సెట్ట నగ కాంచి పియంతేర్. మల్ల డొడ్డొ తగ మాతి కియై వోంతేర్. సమ్మిర్ దాంతేర్. వోసి ఇరంతేర్. రొప్పో వాటంతేర్ తొడ్డి దుర్నంతేర్, పొర్టాక్ బండంగ్ ఇరంతేర్. మల్ల కెయాల్ కాల్క నొరంతేర్. యేత జాగ తగ, కటూల్ పియతేర్ ఊర్ యేర్ తూగంతేర్. మల్ల సమ్మిర్, చెహ, గాటో తింతేర్. బోన నాటే ఊర్ దాంతేర్. మల్ల సియుంగ్ దియనే డివ్వే మలుస్వల్ కాయద కీంతేర్.

8. బెయే బాబో అని కాండి

కోట్టుక కిషాన్ (మహాగామ)

నేండ్ మహా గావత్ రొప్పో సూరోజీ మహారాజ్ నగ ఇద్ ఆసర్తగ వాసికున్ ఉద్వల్ అర్. తేన్సాటి గిర్ "సూరోజీ మహారాజ్ గిర్, ఉంది శిక్షానే డగూర్, ఉంది బొమ్మియ్ డగూర్. బొమ్మి అని శిక్షాన్ ఇంజేర్ ఇత్తైకే మాయ్నన్క ఆదర్. ఆదర్ రొప్పో బతల్ చుడ్డుక్ కాండిర్క బతల్ బెయే-బాబాన ఆదర్. అహన్ ఉందిత్ ఉంది ఆదర్ ఇత్తైకే మానవ జల్మాత్ సాటి. బోన ఆదర్ ఇంకే భగవంతన ఆదర్. అహన్ వొరోన్-వొరోర్ ఆదర్ మంజీకున్ మరటు ఇంకే చుడుడల్ డగూర్ అతల్ తాన్ సాటి ఇంకే. వేసుడి బతల్ కియై ఇత్తైకే (ఉంది కామున్ సాటితయ్ వేసుడి తే తాన్ సాటి ఇద్ వేసుడి బారి ఇంజేర్ ఇత్తైకే. మాకున్ కర్రే మాయో అద్ చీచున్ గిర్ వెహనూర్ ఇంజేర్. బాబన్ పేడల్ ఇంతోర్.

బాబా-బాబా నాకున్ వేసుడి వెహ బాబ! నన్న వేసుడి బతల్ వెహ్కా అర్రే నిమ్ వెహ్వక్ సాత్తైకే నన్న బెయేన్ పూసి కీక. "బెయేన్ పూసి కీమ్" ఇత్తైకే బెయేన్ పూసి కీంతోర్. నాకున్ కరివల్ వేసుడి బహన్ మందంత. ఇత్తైకే పాటి అని పుస్తక్, పాటి ఇత్తైకే లెహి కీతెకే భారత దేశనే పిస్స పరంతి కోకో. అని కెయ్దగ లికన్ సెల్వ పాటి సెల్వ నిమ్మె పిస్స పర్వి ఇంకే. బొమ్మితే మాకున్ కమ్మి మంత. నీకున్ ఇంకె పిసన్ సాటి ఆదర్ బతల్ ఇత్తైకే, పాటి అని పుస్తక్ ఆదర్ తే పిస పరంతి, నిమ్మె దునియత్ రొప్పో భారత దేశున్ రొప్పో దాకి తే నిమ్మె భగగిర్ నిమ్మె వెలిసి వాకి ఇంజేర్ నాకున్ ఇద్ర ఉంది బరోస మంత. ఇంజేర్ బెయే బెరెంకీ పేడన్ వెహ్కా.



పేడల్ ఇంతోర్ కరలే ఆందూ ఇదు పాటి ఇత్తైకే బొమ్మి ఆందూ లికన్ ఇత్తైకే బాబల్ ఆందూర్. నిమ్మె బెయేని, వోర్ బాబల్ వెహ పర్మకి బతి. వోర్ లెహి కీసి సాడితోర్ బతి బెయేయ్ వెహ్కా నిమ్ బెయేయ్ డగూర్ ఇంజేర్. బాబల్ మందనూర్ బతి నిమ్ బెయే పాటి ఇంజేర్ కెయ్దగ సీతి ఇంజేర్ భారత దేశున్ రొప్పో పిస్కి ఇంజేర్. బెయే నాకున ఆదర్ వెహ్కా. బెయేనయ్ గొట్టా కరల్ ఇంజేర్ బెయేనంగ్ సాంజి కల్ కెర్తో అస్కే. వోర్ కెయ్దగ పాటి పియ్య వోర్ లెహి కియా లాగ్తోర్. లెహి కీనెకే వోర్ ఇంతోర్ కీ, బాబల్ ఇంతోర్ సడాపి వాట రా? హే! నన్న సడాపి వాటోన్ కీ నాకు సాడతే సాన్వల్ మంత బెయే పాటి అని లికన్ సీత. నాకున్ సాడతే సాన్వల్ మంత.

నన్ను కోందంగ్ మెహూన్ కీ, అర్రే! నీ సాటి నన్ను బొమ్మి పియ్తాన్ రా! సిల్లే నన్ పాటిని పుస్తక్ బెయ్ వెహ్తా పాటిని పుస్తక్ సీమ్ అస్కె. నన్ను సాడతే సాన్లె కున్ ఉసీర్ ఆంత, అదేన్ సాటి నీవ సడాపి, వాబోన్ వియ్యూర్ సియోన్ ఇంజేర్ పేడల్ బాబన్ ఇంతోర్.

అర్రే నిమ్ భారత దేశున్ రొప్పొ బగ పిస్కి రా! వెల్లె డగూర్ నార్ మంత, ఆతల్ నాటే నిమ్మె బతల్ పిస్స పర్కి. సిల్లే బెయ్ వెహ్తా అద్దే గొహ్టా కరల్, బతి బాబన్ గొహ్టా కేంజోన్ ఇంజేర్, వోర్ కాండి ఇత్తోర్ అస్కె. వోర్ కాండి పెజ్జె మల్ని బెయ్ పూసి కియ లాతోర్. బెయ్ ఇత్తెకే సిల్లే కో! కో! బాబల్ అని బెయ్ మత్తెకే జల్మ వాంత, అని బొమ్మిని శిక్షాన్ మత్తెకేన్ (సూడ మనియన్ రొప్పొ వాంత.) తన్వ కెయ్దే తనకున్ గిర్ వొడ్కి వాంత. కెయ్దే గిర్ పియన నేరు అని తొడ్డే గిర్ ఇందన రామ్!

అదేన్ సాటి కామున్ తగ పేన్ మంత అగ భగవంతల్ మందంత ఇంజేర్ సూరోజీ మహారాజ్ ఇహిన్ శిక్షాన్తున్ సాటి గిర్రే ఇద్ మావ గోండి సమాజున్ సాటి గిర్ ఉంది ఆశ్రమ ఖోలి కీతోర్. వోన ఆసర తే ఇంకే సర్కార్ గిర్ ఆసర్ కీసేర్ మంత. అదేన్ సాటి శిక్షానే డగూర్-ఉంది బొమ్మియ్ డగూర్ ఇంజేర్ అద్ గొహ్టాత్ సాటి ఇంకే భక్తి బతత ఇత్తెకే భగవంతల్ మాక్ జల్మ సీతోర్ వోనయ్ భక్తి కియన అని బొమ్మిత కియన. అని శిక్షానే కరియన ఇంజేర్ సూరోజీ మహారాజ్ మాకున్ వెహ్తోర్. అదేన్ సాటి ఇంకే బొమ్మి పహ్లాజె ఇంతోం, శిక్షానే పహ్లాజె ఇంతోం. శిక్షాన్ ఉండే బొమ్మి ఉండే లాగో ఇంతోర్ వోర్ మాయ్నల్ నిస్తో లావ అర్ని జన్వారత్ దాత్ ఇహిన్-సమ్మే మాసూర్ ఇంజేర్ సూరోజీ మహారాజ్ వెహ్తోర్. అదేన్ సాటి ఇవ్ రండ కామ్క మాత్రం జరురి కియన అని భగవంతన్ రోజి హేతు కియన ఇంజేర్ సూరోజీ మహారాజ్ వెహ్తోర్.



9. జంగు అక్కోన నార్ సూడ్డే సొత్తోర్

వేందూర్ దుర్నత్ రావ్ (భీముగూడ)

జంగు (తజ్జీమరీ): రామ్ రామ్ అక్కో.

లింగు (అక్కో): రామ్ రామ్, వా! యేర్ తరహా వెర్తల్ వాతోర్.

జంగు: కాకో చొకొట్ మంతిట్ నిమ్మెట్ సమ్మిర్?

సోం బాయి (కాకో): హా, మంతోం. నిమ్మెట్ సమ్మిర్ చొకొట్ మంతిట్?

జంగు: హా.

సోం బాయి: బెయే గిర్ మంత?

జంగు: హా. కాకో, మామల్ అని ఆతి బేకె సొత్తోర్?

సోం బాయి: ఊర్ హాటుం సొత్తోర్.

జంగు: రాము బేకె సొత్తోర్?

సోం బాయి: రాము కాండిర్ సంగ బేకెయ్.

జంగు: మమతల్ బేకె సొత్త?

సోం బాయి: మమతల్ సాడతే సొత్త.

జంగు: ఊర్ సాటి లడుంగ్ తత్తోన్.

సోం బాయి: తా ఇర్కట్. ఆజి తాదో బతల్ కీంతేర్?

జంగు: రోనే మందంతేర్.

సోం బాయి: బద్ బద్ వావై కాపున్ ఉర్నతిట్?

జంగు: మర్క వావై, అని సిత్త వావై.

సోం బాయి: జొన్న బగ్గ యెతిట్?

జంగు: జొన్న పాటర్తే.

సోం బాయి: మీవంగ్ హెర్రేంగ్ మూరంగ్ బోర్ మెహంతేర్?

- జంగు: అవేన్ మెష్లా గడియల్ ఇర్తోర్.
- సోం బాయి: మీ చుడూర్ ఆజన్ యెడ్కి వాండు బహన్ మంత?
- జంగు: జరసి చొకొబ్ ఆత.
- సోం బాయి: కుమ్రె మాతరి బహన్ మంత?
- జంగు: చొకొబే మంత.
- సోము (మామల్): మీ నాటే బోనంగ్ మర్మింగ్ మంతంగ్?
- నడేమరి (జంగు): మా నాటే కనక లిరంగ్ మర్మింగ్ మంతంగ్.
- సోము: బగట పేడి?
- జంగు (నడేమరి): మహరాష్ట్రత.
- రాము: బస్కే వాతి సంగి?
- జంగు: దుపారి వాతోన్.
- రాము: బోర్ బోర్ వాతిబ్?
- జంగు: నన్న వొరొనయ్. నిమ్మె బేకె సాంజి?
- రాము: నన్న కర్నలే.
- రాను బాయి (ఆతి): బెయేని బాబల్ మా నాటే బస్కే సూడ్ల వాంతేర్?
- జంగు: సంక్రాంతిత్ వాంతోం ఇత్తేర్. మా నాటే బస్కే సూడ్ల వాంతిబ్?
- రాను బాయి: యెద్ది గాలుం వాంతోం.
- జంగు: వరాబ్ మెంజే.

10. దేవారి అని పిర్

మదావి లక్షిమణ్ (దుబ్బుగూడ)

ఇహిన్- మావ ఉంది చుడ్డున దుబ్బుగూడ మత్త. దుబ్బుగూడ మత్తెకే బతల్ ఆత కీ దిహ్నా మన్నెకే సమ్మి "యెదంగ్ మిదంగ్ ఆతంగ్ ఆత పజ్జె సమ్మి మక్కెంగ్, పెసెల్క్, పుడ్పూల్క్, పుంగర్ వాతంగ్, ఇహిన్ చీచే పుంగర్ వాతంగ్. మక్కెంగ్ జేల, డొడ్డే వాట్టంగ్, మక్కెంగ్, భాడింగ్, సామంగ్ మియ్తంగ్. యెక్కమ్ ఇదు పోర మహిన వాత. వాత పెజ్జె హిన్ పిర్ కబ్కే పిర్ బద్ ఆత. ఆతకే భాడింగ్ సామంగ్ మియ్లెక్ వాతంగ్, పెట్టె పెట్టె ఆతంగ్, మియ్తంగ్, ఇంకె పుంగర్ పియ్యలిక్, దాన నింద్యలిర్, మక్కెంగ్, భాడింగ్, సామంగ్, పెసెల్క్, పుడుపుల్క్, సాద్యలిర్, పిర్ సాత్త.

పిర్ సాత్త ఇత్తెకే ఇంకె బహన్ కీకట్ రా! పబ్లిక్ పరిసన్ ఆతేర్ ఇంకె బహన్ ఇంకె మావ మక్కె డొక్కె మావ బాడింగ్, సామంగ్ మావంగ్ దాంతంగ్ పెసెల్క్, పుడుపుల్క్ ఇంజెక్ ఇత్తెకే గొట్టా కీతేర్ (చంద) వాత్తేర్. ఇంకె పేన్ తుంకట్ పిర్ పేన్క్. భగ తుంకట్ రా! సిల్లే మావ పిడ్కె ఫీండితగ పిడ్కె ఫీండిత అవ్వక్ నగ వోసికున్ పేన్క్ తుంకట్ ఇంజెక్ ఇంతేర్. పేన్క్ తుంగ్లె చంద (సార) మీరి కీతోర్, గొగ్గింగ్, యేత్తేర్ బక్రంగ్, యేత్తేర్ పెరేక్, చెట్టింగ్, మీరి కీతేర్. పబ్లిక్ అని సమ్మిర్ మీరె మాసి కున్ "సోరేయ్ దేవారి సో దేవారి పేన్క్ తుంగ్ సోరేయ్ దేవారి పేన్క్ చొకొట్ తుంగ" హా! దేవారి సాత్తోర్ పేన్క్ తుంగ్తోర్, అత్తేర్, బొడ్సేతేర్, తిత్తేర్ ఉడిర్ మస్తకీ. మర్ల రోత సరి వాతేర్. రోత సరి వాతెకే బగ్గన్ ఇమ్మర్ చిట్టా డగ్ సెల్లె బతయ్ సిల్లే హాబడా బేకెన్ గడుల్ సెల్లె, బేకెన్ గుడుల్ సెల్లె, బేకెన్ ఝులా జిల్లా మిడ్చో. అర్రే! బహన్ దేవారి పేన్క్ కీతోర్ రా! ఇంతేర్. నాట్టు పబ్లిక్ పేన్క్ "దేవారి బరో బర్ కీచిలోర్ పేన్క్ తుంగ్చిలోర్ వేన్ మాయి్యతె దేవారి నతే తిన్వాలే కీతోర్ రా! తిన్వాలే సూడ్తోర్ లేకాల్ మత్తంగ్ మీరి కీతోర్ చంద తందర్ మందర్ పేన్క్ కీతోర్ ఆదర్ వాదర్ అని తిత్తోర్ లేకాల్ పూత్తెగా అని గవ్ చుపె వాతోర్ అని గవ్ చుపె మంతోర్" పోడ్డే సాత్త నర్క ఆత హక్కె రురుప్ మీరె మత్తేర్. అని హక్కె వడ్కంతేర్ నాబేన్ రొప్పో, సిల్లే

దేవారి పేన్క చొకొట్ తుంగ్చిలోర్ నాడి పిడ్క ఫీండి తగ వోసికున్ ఆవ్ ఫీండి అవ్వక్ నగ దేవరినే సూజార పాకట్ రా! ఇంతేర్.

తే సమి నార్ సుల్ సులో మత్త. సమి యేలన్ ఆసి సొత్త కీ దేవరిన్ నాడి ఫీండి బెయ్యేక్ నగ వోసి సూజార పాంతేర్ చుడూర్ డగూన్ యేలన్ ఆసి సొత్త. (కరేమాత) ఆన్గట్ పాన్ఘాట్ దాంతంగ్ బాయికు వడ్కంతంగ్ యేర్ నిహ్లా, సుక్లే తే సిల్లే బెర్రే నేండ్ బెర్రే దేవరిన్ కున్ సూజార పాంతేర్ బేరెంగ్ కీ! ఫీండి అవ్వక్నగ ఇహిన్-వడ్కంతేర్ తే వేర్ నరుంసిన్ మంతోర్ దేవారి తే వేన వెయ్యె కెంజేత హక్కె బగ్గ కుహిత యేర్ తర నగ వాత యేయ్ దేవారి బహ్లా నిమ్ బతంగ్ నర్మంతి నిమ్మె నీ పారోతే వెల్లె మంత! బతల్ గడ్-గిడ్ తేత్తోర్ దేవారి బతల్ ఆత ఇత్తైకే నేండ్ బెర్రే సిక్స్ ఫీండి అవ్వక్ నగ సూజార పాయ్యలిర్ మంతేర్ నాటూర్. హా! ఎక్దమ్ దేవరిన్ దక్నే జీవ ఇత్త దేవారి దాంద్రే మాతోర్ దేవారి కీ తడగ్నే రోత్ పెజ్జె సాన్మడ్ తే యేలుం డెహొక్కడతే పట్ పియ్తోర్ బేకె కేడ సరి ఇగె విత్ అగ విత్తతే సూడైతేర్ హా! దేవారి దాంతోర్ సాడి యాంతోర్, విత్తాట్, నెయ్యె విత్తప్పే ఇంకె మొల్లోడ్ పెజ్జెయ్ లాక్తప్పే హా! కేడ మేడ దేవరిన్ కున్ పూడంతేర్. మత్త కహి బగ్గన్ వొల్ల సియూర్ బేకె సూడ వాంతేర్ సూడ అగ్గ మంతోర్ అగ్గ మక్తోర్ ఇంతేర్ విత్తంతేర్ మక్తోర్ ఇన్నెకె అగటల్ సప్పే పెసియంతోర్ దుస్రా జాగ దాంతోర్. దుస్రా పొద్దెలన్గ కుప్పే మంతోర్ కహి వోన్కున్ సుక్ వాయ సియూర్.

హాన్ దిహిన్ కీనెకే ఎక్దమ్ పారా కప్పితగ సొత్తోర్ కీ తొలై పిర్ వాసి మత్త పిర్ వాత అద్దె యేత్ రొప్పొ ఊసాత్ రొప్పొ కుహ్చా మేస్ కరి వాత ఆసి ఉంది పేరా జత్తి రోత్ దాత్న బండ మంత. కుడెడ్ రొప్పొ అగ్గ కుడెడే అద్ మడ్చునగ అద్ తే అగ్గ ఇచూర్చు యేర్ మంత చెల్లె అవ్చోరే బండాత్ బూడ్ అగ్గ ఇంకె సాతోన్ పిస్తోన్ ఇంజేర్ దేవారి గప్ ముడుంగ్గి మిండ్తోర్ కీ నొడ్కనేర్ అద్ బండత్ రొప్పొ నేంగ్తోర్. బండత్ రొప్పొ నేంగ్తోర్ కీ అగ్గ నేంగ్ తెకే అగ్గ బతల్ మంత కుహ్చా మిన్ మంత. కుహ్చా అగ్గ పిల్లంగ్ తెంటా. పిల్లంగ్ మంతంగ్ ఇత్తైకే సిల్లే ఇత్తైకే కిల్లో దేడ్ కిల్లోమంతంగ్ కుహ్చాతంగ్ పిల్లంగ్ మూలంగ్. బెయే పిర్ సెల్వ నొముట్ సాంతోం. హా దీరాట్, బేట దీరాట్, దాంతోన్ నేండ్ 12 బజ్జె రాత్ ఆయి ఆతెకే నన్న శ్రీ

సంబు మహాదేవన్ గ సాంజికున్ భగవంతనగ పిర్ దా అను బావ తరంతోన్ ఇంజెక్ ఇత్త బదూ కుహ్చే అవ్వల్ ఇనెకెనె మంగ్ బతల్ కీతకీ. వేర్ ఇంగ్ పాట్-పాట్ ఇంగ్ నాకున్ పిర్ల అనుబావ్ పుట్టంత వోర దహ్నా గవ్ ముడుంగ్ని మంతోర్ అగ చిప్పెఆసికున్ బండ బూడ్ చేపే మాసికున్. పారొడల్ పాట బూడ్చల్ పాట అగ ఇచ్చుస డోప్పాడ్ మంత పిల్లంగ్ మంతంగ్ చడ్-వడ్ ఆసేర్ ఇంకె బదేన్ యేర్ మంత బదేన్కునే యేర్ సెల్లె బద్దె-బద్దె బహ్నా మంతంగ్ యేతె నికాల్ చీపా చొప్ప ఆసి సాత్తంగ్. ఇంజెక్ ఇన్నెకె సాంతొం సాంతొం ఇంజెక్ ఇంతంగ్ పిల్లంగ్ దీరాట్ ఇనెకెనె అద మద 12 రాత్ అస్కె మర్ల అద్ కుహ్చా మీన్ సాత్త. ఆకాశనే సాత్త శ్రీ శంభున దర్బారతె కేంజంత తే (వేహంతతే) తే ఇంద్రదేవ నిమ్మి పిర్ పబ్లిక్ బెరెంకి బయ్ పరిసంతే మంతేర్. పిర్ నిమ్ వోయన నూడ ఇంత ఇంద్రదేవన్కు హా! నూడ పబ్లిక్ పరిసన్ ఆసేర్ మంతేర్. ఇదు జాతి, జన్వార్ పరిసన్ ఆసెక్ మంత మీన్ ఇహిన్ ఇత్తల్ సప్తి పబ్లిక్ జాతి జన్వార్ పరిసన్ ఆసెక్ మంత. ఇంజెక్ ఇత్త ఇనెకెనె హా! నేండ్ ఇంకె నాడి దుపారి ఆసికున్ నాడి సక్రే దుపారి ఆసికున్ 12 అని 1 అన్నెకే మాత్రం పిర్ కోరాత మరీ మియాడ్ సమ్మె మాయ్యక్నే అవ్వన్కున్ ఆతల్ పిర్ వాయర్. ఇంజేర్ వడ్కంత మర్ల మంగ్ అచ్చోరే కెంజత కీ కుహ్చే పహ్లా కాలి వాత గొగ్గింగ్, కూనెకే పిల్లంగ్ బెయే "బగట్" పిర్ ఇంతంగ్. పిల్లంగ్ కుహ్చా పిల్లంగ్ హా! "దీరాట్ బేట నేండ్ దుపారి ఆసికున్ 12 అని 1 అన్నెకే నూడట్ బేట మిరట్ బేకేయ్ నన్ను బేకేయ్ ఇంత కుహ్చే తే పీట మరిమియాడ్ కోరాత అవ్వన్కున్ సమ్మె మాయ్యక్ దాయర్ ఆతల్ పిర్ వాయ్యల్ మంత కోకో దీరాట్ బేట" ఇంజెక్ ఇత్తెకే అస్కె మంగ్ 12 అని 1 అన్నెకే దాడ్-దూడ్ గాడ్-గూడ్ జాల్-జిల్ మిడ్చుంత ఇనెకెనె మర్ల మంగ్ అస్కె 12 అని 1 ఆత అస్కె నూడ సేతితే రోస్కెతవ్ పిర్ వాత నూడ బాప్రె ఇంకె బస-బస ఊస నించి కున్ వాతెకే కుహ్చా పోరిక్ బెకేయో అవ్వల్ బెకేయో సప్తి బెకేయో. హా!

మంగ్ వేర్ మత్తోర్ దేవారి అగటల్ పెసితోర్ వాతోర్ సక్రే రోను హా! నూడంతేర్ తే మత్త డెహడంగ్ ముహడంగ్ నిచీ వాతోర్ దేవారి రేయ్ దేవారి వాతోర్ బతి బయ్ డెహడంగ్ నిచీ కున్ వాతోర్ కీ రా ! భగక్ నెంగ్ని మత్తారెయ్ బద్ కేక్కి గదితగ నెంగ్ని మత్తోర్ రా! హా! బద్ కోకుడతగ నెంగ్ని మత్తోర్ వెర్రేతా ధాకున్ పబ్లిక్ ఇంతేర్ నాట్నూర్ వాతోర్ కీ రోత్ రాప్సా

నెంగ్గి "కాసుసిం హా! యేర్". యేర్ తుంగ్తోర్ బతల్ ఇంతేర్ హక్కె నాట్లోర్ పాట్లాల్ హక్కె హవల్దార దేవరిన్ కేయ హవల్దార సాత్తోర్ దేవారి నీకున్ పాట్లాల్ కయ్యెర్ మంతోర్. హా! హా! "హాన లహ్కా తెన్వాక ఇచ్చోర్ రేస్కెడ్ బోస్కెడ్ డెహడన్గ నన్న పాతడ దిప్పే సాంజి మత్తోన్ పిర్ల జాడతున్ హా! నాకున్ డటాయి కీంతిటూ పాతడ దీవన్గ సాంజి మత్తోన్. వాక నన్న ఆరమ్మె మీవ లహ్కాతెన్ వాక హా!" వోర్ మల్ని సాత్తోర్. భోరు హవల్ దారల్ హా! "సిల్లే బెర్లే వోర్ యేర్ మూర్ తుంగ్గికున్ వానుర్ బెర్లే డెహడంగ్ ముహడంగ్ ఆసి మత్తోర్ వోర్ పాతడ దిప్పే సాంజి మత్తోర్ పిర్ల జాడత్ లాసి పిర్ తర్లె మర్ల యేర్ మూర్ తుంగ్గికున్ మర్ల ఆరమ్మె వాంతోర్ బెర్లే." మర్ల యేర్ మూర్ తుంగ్గోర్. మర్ల ఇచ్చున్ నాలుంగ్ భుక్కంగ్ జేవి కీంతోర్ మంగ్ జోక్కే వాంతోర్.

రామ్! రామ్! పాట్లాల్ బేకె సాంజి రా దేవారి నిన్నేతల్ పాట్లాల్ ఇంతోర్. హే పాట్లా నిన్నే పేన్కె తుంగ్గోన్ నన్న పిర్ వాయుడ్ సిల్లే నాకున్ పాల్తా కీత. ఆని నాట్లూర్ తే నాకున్ సూజార పాల్తె భీండి బెయె నగ తెయూర్ ఆతేర్. తాన్ లాసి నన్న "పాతడ దిప్పే సాంజి పాట్లా పిర్ల జాడ తార్లెన్" ఇంజెక్ ఇత్తోర్. అని సాత్తోన్ సాంజి కున్ నర్క పడింగ్ మత్తోన్ హక్కెనే మంగ్ బస్కె వాయర్ రా పిర్ దేవారి, ఆర్లే "పిర్ 12 అని 1 బజ్జె మీవంగ్ బతంగ్ అందుంగ్ తే సుద్రి కీసి ఇరటూ మీవంగ్ వడ్వలిక్ ముడ్వలిక్-మత్తెకే అవెకున్ వేసాట్ రొహుక్ రచ్చంగ్ అని మీవేర్ మరి మియాడ్ బేకెన్ పక్కె మాయ సియ్యుట్ అవ్వన కోరతల్ మరి మియాడ్ సమ్మె మానల్ ఆయె ఆతల్ పిర్ వాయ్యుల్ మంత" దేవారి వెహంతోర్ బన్ని కీసి దేవారి అస్కె మర్ల మంగ్ కెంజేతేర్ సమ్మిర్ చపాటింగ్ పాతేర్. దేవారి బేన్ ఆతరా పాతడ దిప్పే సాంజి బెర్లే పిర్ తర్లె హోర్లే మావ గల్లి ఆతరా వోన్కున్ సూజార పాకట్ ఇహిన్ వడ్కెతేర్. పల్లిక్ మర్ల 12 అని 1 బజ్జె అన్నెకే తే పిర్ వాత సమ్మిర్ బెరెంకీ మస్త ఆత బేన్ ఆత వోన్కున్ వహా వాకి సీతేర్. అస్కె మల్ల మాల్ టాల్ మక్కెంగ్ డొక్కెంగ్ సమ్మి భాడింగ్, సామంగ్, పెనెల్కె, పుడ్పూల్కె సమ్మి అస్కె జొన్నంగ్, కాపుస్కె చొకొట్ పంటత్ ఆత. అస్కె కరల్ దేవారి రా! ఇమన్దారల్ సాంజికున్ కరలెన్ పిర్ తత్తోర్ ఇంజి కున్ వోన్కున్ వని కీతేర్.

